

TEZAU LITURGIC

30 Iunie

ACATISTUL SF. CUVIOS PETRU DE LA ROSTOV



MOSCOVA, 2000



Акафист

святому преподобному Петру

Царевичу, Ростовскому

чудотворцу

Кондак 1

Избранный Богом от агарянского рода царска, и вчиненный в недра Православныя Христовы Церкви, наученный святыми апостолами Петром и Павлом к созиданию во имя их святыя обители, прими от нас недостойных хвалебную песнь тебе приносимую:

Радуйся, преподобне царевиче Петре, Ростовский чудотворче.

Икос 1

Ангела ты земнаго видяще, о небесный гражданин, преподобне царевиче Петре, возревновахом мы недостойнии похвальная воспевати тебе сице:

Радуйся, терпением угодивый Господу.

Радуйся, яко Господь внят ти, и услыша молитву преподобнаго Своего.

Радуйся, яко удалился еси, бегая от дому и племени твоего.

Радуйся, яко жительствуя среди языка безбожнаго, желание возымел ко Христу обратитися.

Радуйся, яко бдел еси в молитве сердечней к Богу.

Радуйся, яко колена твоя изнемогоста от поста, но душа твоя бодрственна бысть в духовном делании.

Радуйся, яко плоть твоя изменися трудов и пощения ради, но дух твой возвысися в воздержании.

Радуйся, яко исповедятся Господеви о обращении твоём преподобнии Его.

Радуйся, яко с ними воспеваеши на небесех славу Божию.

Радуйся, яко с ними выну благословиши Его.

Радуйся, яко ублажаеши с ними величие Святыни Его.

Радуйся, преподобне царевиче Петре,
Ростовский чудотворче.

Кондак 2

Видя святой Петр себе непорабощенна
плотскому сладострастию, радовашеся духом,
желая прилепиться Христу всем сердцем, и
воспевати Богу: Аллилуия.

Икос 2

Разум недоразумеваемый о Триипостасном
Божестве, и о безсеменном воплощении Бога
Слова, разумети не искаху ослеплении
прелестию идолослужения древнии ханы
Ордынстии: ты же, святой Петре, по благодати
Божией озарившей тя, и в неверии еще ти сущу
свещильника Ростовския паствы епископа
Кирилла в научение тя христианстей вере
взыскал еси. Сего ради ублажаем тя сие:

Радуйся, подобне Корнилию сотнику, и в
язычестве добродетельми сиявый.

Радуйся, подобне ему, вместо апостола Петра
преемника апостольскаго, епископа Кирилла
взыскавый.

Радуйся, яко на тебе сбытся апостольское слово: «Во всяком языке бойся Бога и делаяй правду, приятен Ему есть».

Радуйся, яко всевидящее око Божие, узрев твое усердие, благодатию Святаго Духа озари тя.

Радуйся, яко неизреченный Божий Промысл potrzeby ради Церкви, тебе же во спасение епископа Кирилла во Орду приведе.

Радуйся, яко Ростовский иерарх царя Беркая, дядю твоего, беседою о чудесех в Церкви Христовой являемых улади.

Радуйся, яко ты, млад быв юноша, глаголами святителя Кирилла сердце свое умили.

Радуйся, яко размышлением о христианстей вере ум твой просвети.

Радуйся, яко в любовь Христову душею своею уловлен был еси.

Радуйся, яко от любве сердечныя к Богу слезы от очию источи.

Радуйся, яко мерзость идолослужения презре.

Радуйся, яко в христианстей вере утвердиться искренно вождедел еси.

Радуйся, преподобне царевиче Петре,
Ростовский чудотворче.

Кондак 3

Сила Вышняго осени ты царевиче Петре,
отвергши бесовское служение твари,
прилепится Христовой вере православней.
Темже яко ревнитель святыя веры показался еси
крепок всем ты воспевающим и радостно
поющим Богу: Аллилуия.

Икос 3

Имый богоприятную мысль, святой Петре,
познати истины христианския веры, при
вторичном пришествии во Орду Ростовскаго
святителя Кирилла, ради исцеления царева
сына, и видев чудесное его оздравление
благодатию Христовою и молитвами архиереа
Божия совершившееся, ты крепчае прилепился
еси ко Христу, и возжелал еси быти христианин.
Темже радостно взываем ти таковая:

Радуйся, яко подобник был еси соименному
ти верховному апостолу Петру.

Радуйся, подобно ему, оставившему мрежи и
отца своего, и ты дом царский и сродство свое
оставил еси.

Радуйся, яко славу наследия земнаго царства во Орде ты презрел еси.

Радуйся, яко вся красная мира сего во уметы Христа ради вменил еси.

Радуйся, яко во след Христа Бога радостно потекл еси.

Радуйся, яко женонеистовую страсть агарянскую отвергл еси.

Радуйся, яко теплою душею крещения святаго ты взыскал еси.

Радуйся, яко тем осияние Христово в сердце твоём приял еси.

Радуйся, яко Возлюбившаго нас прежде сложения мира приискренне возлюбил еси.

Радуйся, яко благое иго Христово прияти восхотел еси.

Радуйся, яко бремя Иисусово легкое понести потщался еси.

Радуйся, преподобне царевиче Петре, Ростовский чудотворче.

Кондак 4

Буря страстей юностнаго телесе и мирских прелестей и славы земныя не поколеба храма

души твоея, преподобне Петре: основан бо бе на камени краеугольном исповедания Христа, Ему же яко Богу и Спасителю нашему воспеваем: Аллилуия.

Икос 4

Слыша князь и вси людие богоспасаемаго града Ростова, яко первосвятитель их Кирилл грядет из посольства с дары и честью от царя, имея при себе приобретенное его наставлении духовное сокровище, тебе блаженне Петре, хотящаго прияти православную веру во граде Ростове, возрадовашася радостью духовною. Темже и мы, аще и недостойнии, дерзаем в радости сердец взывати тебе сице:

Радуйся, от любви душевныя к Богу отечество твое оставивый.

Радуйся, желания ради ко христианстей вере обратитися, богатство и честь мирскую суету быти вменивый.

Радуйся, плотскую любовь матери твоея, царя дяди, и всех презревый.

Радуйся, единого Христа возлюбивый.

Радуйся, с любовью сердечно наставление епископа Кирилла о вере христианской послушавый.

Радуйся, отшествия епископа Кирилла из Орды в Россию усердно назиравый.

Радуйся, в благочестивом твоём намерении, препятствия сродников не убоявыйся.

Радуйся, тайно из дому твоего удаливыйся.

Радуйся, епископа на пути достигнувый.

Радуйся, пояти ты с собою его умоливый.

Радуйся, от горящая веры слезами многими ланиты твоя оросивый.

Радуйся, яко незлобивое овца Христова стада со пастырем Церкви во ограду христоименитых людей вшедый.

Радуйся, преподобне царевиче Петре, Ростовский чудотворче.

Кондак 5

Боготечней звезде ты, преподобне царевиче Петре, подобен был еси, егда из нечестивыя Орды, к богоспасаемому граду Ростову путь шествия творил еси. Святитель же Божий Кирилл, радуясь душою о твоём благом

произволении, с трепетом воспеваше Богу:
Аллилуия.

Икос 5

Видеша людие Ростовстии, яко возсия в сердце твоём свет Христа Бога, и из неверия обрати тя в правоверие, возрадовашася сердца своими, сего ради и мы удивившеся неизреченному смотрению Божию, вопием ти:

Радуйся, по пришествии в Ростов, благолепие храмов Божиих с любовью и благоговением созерцавый.

Радуйся, себе самага во храм духовен устроиый.

Радуйся, и не быв ещё просвещен святым крещением, в Церкви Божией пребывавый.

Радуйся, церковная чтения и пения сладце внимаый.

Радуйся, по умертвии царя Беркая во Орде возвратитися туда не восхотевый.

Радуйся, и взысканию о тебе бывшу, под кровом святителя себе укрывый.

Радуйся, мздовоздаяния в Царствии Небеснем возжелавый.

Радуйся, крещения святого со усердием и верою испросивый.

Радуйся, таинство крещения рукою епископа приемый.

Радуйся, во имя апостола Петр нареченный.

Радуйся, грамоте и церковному чтению и пению прилежно научивыйся.

Радуйся, для утверждения в вере христианстей в доме архиерейstem вселивыйся.

Радуйся, преподобне царевиче Петре, Ростовский чудотворче.

Кондак 6

Проповедует созданная тобою во имя святых верховных апостол Петра и Павла святая обитель, яко ты, блаженне Петре, был еси всем благоприветлив и любезен, и якоже древний Иов, око слепым и нога хромым. Сего ради воспеваем Богу: Аллилуия.

Икос 6

Возсиявый во Египте просвещение истины, и отгнавый лжи тму, Христос Бог наш благоволи возсияти и во языческой Ордынской стране молитвами и крепкою верою святителя Кирилла,

исцелившего царева сына от болезни, и тебе святой Петре царевиче, светом познания веры христианския озарившего. Того ради сице вопием ти:

Радуйся, от языческаго племени в веру Христову призванный.

Радуйся, от тины идолослужения, банею пакибытия обновленный.

Радуйся, от корене злоращенного благовонный цвет произрастший.

Радуйся, злострадного зловония страстей избегший.

Радуйся, яко пчела люботрудная сладкий сот добродетелей сотворивый.

Радуйся, сладкопитания плотская пренебрегший.

Радуйся, бдению и воздержанию себе с терпением изрядне научивый.

Радуйся, пост возлюбивый.

Радуйся, молитвы сердечныя к Богу возсылавый.

Радуйся, чистоту целомудрия опасно сохранивый.

Радуйся, всякими добродетельми себе
украшивъ.

Радуйся, преподобне царевиче Петре,
Ростовский чудотворче.

Кондак 7

Егда приближися время епископу Кириллу
отити ко Господу, он, яко наставник твой,
царевиче Петре, в вере христианской не остави
тя сира, но утверди на пребывании в доме
архиерейстем до пришествия преемника своего.
Святой же епископ Игнатий, по вступлении на
престол Церкви града Ростова, зря тя
преспевающа в возрасте духовном, зело возлюби
тя и радуяся духом воспеваше Богу: Аллилуия.

Икос 7

Новое чудо и дивное, премудростию судеб
Божиих, исполнися на тебе, блаженне царевиче
Петре, егда помышляюще ти создати церковь и
при ней монастырь устроить, довольнаго же на
дело сие не имущу стяжания, и о сем
болезнующу сердцем, случися ти уснути на бреге
езера Неро, и видети во сне верховных апостол
Петра и Павла грядущих и два мешца злата и
сребра на созидание обители во имя их

вдающих: возбнув же от сна во ужасе и яве оныя узрев, и в руцех твоих злато и сребро ощутив, возрадовался с трепетом. Того ради и мы воспевати тебе научихомся, глаголюще:

Радуйся, попечение о создании церкви от любви к Богу возымевый.

Радуйся, об устройении обители неусыпно пекийся.

Радуйся, свое иноческое житие пророчески предзнаменовавый.

Радуйся, на создание оных довольно не имев сокровища, желания своего не оставивый.

Радуйся, несомненную на него надежду имевый.

Радуйся, в сонном видении и яве верховных апостол Петра и Павла узревый.

Радуйся, дарование их тебе злата и сребра в руце приемый.

Радуйся, заповедь их о приобретении триех икон на торжищи исполнивый.

Радуйся, иконы Богоматери с Предвечным Младенцем, святителя Николая и великомученика Димитрия у иконописца, серебром и златом апостольским приобретый.

Радуйся, преподобне царевиче Петре,
Ростовский чудотворче.

Кондак 8

Странное чудо является и дивное, яко в
туюжде ночь, егда тебе, святой Петре, явишася
верховнии апостоли, и святителю Игнатию они
же повелеваху, да храм во имя их устроит,
епископ же тому видению ужасеся, и пригласив
князя, поведя бывшее, и вкупе оба совет о сем
сотвориша, и воспеваху Богу: Аллилуия.

Икос 8

Весь быв, блаженне царевиче Петре,
погружен в размышление о Бозе по видении
апостол и о созидании обители, при
молитвенных же и постных трудах, смирению и
послушанию и терпению научился еси, якоже
повесть жития твоего являет, сего ради вопием
ти:

Радуйся, к созиданию обители ревность
велию имевый.

Радуйся, заповедь апостольскую тщательно
исполнивый.

Радуйся, яко на совет князя со епископом о
тебе пришедый.

Радуйся, намерение князя о сочетании ты
браком без ропота послушавый.

Радуйся, взысканию тебе князем невесты из
честна рода не прекословивый.

Радуйся, тем послушание ко князю и
епископу показавый.

Радуйся, "Воля Господня и ваша да будет", —
отвещавай.

Радуйся, по желанию князя и епископа,
законному супружеству приобщивыйся.

Радуйся, самым епископом святым Игнатием
браковенчанный.

Радуйся, апостольская словеса: "Брак честен
и ложе нескверно" верно сохранивый.

Радуйся, и в супружеской жизни в делании
добродетелей искусна себе явивый.

Радуйся, преподобне царевиче Петре,
Ростовский чудотворче.

Кондак 9

Всяк возраст и весь народ града Ростова,
вкупе с князем и святым епископом Игнатием,
удивившися приобретенным тобою, блаженне
Петре, святым иконам, дивный свет

испускающим, внесше их во храм соборный, со усердием воспеваху Богу: Аллилуия.

Икос 9

Вития суемудреннии еллинского нечестия последи же магометовым зловерием исполненнии, не могуще истинных догмат православныя веры познати, умолкоша. Мы же слышаще предивное твое из язычества в христианскую веру обращение, похвальная, блаженне Петре, приносим ти вопиюще:

Радуйся, по видении апостолов, сладость духовную в сердце твоём ощутивый.

Радуйся, тогда ум твой Горе вперивый.

Радуйся, помышления твоя в тайны смотрения Божия углубивый.

Радуйся, яко о пременении себе из язычества в христианина веселивыйся.

Радуйся, яко любовью ко Христу и верховным апостолом разжженный.

Радуйся, из врученных тебе от верховных апостол, девятию сребренники и единою златицею, чудныя три иконы приобретый.

Радуйся, яко в радости духа к епископу с теми иконами поспешивый.

Радуйся, святого епископа в недоумении бывша о видении верховных апостол зревый.

Радуйся, и князя ко епископу пришедша совет благий о устроении храма радостно слышавый.

Радуйся, яко от икон тобою принесенных палата архиерейская дивным светом озарися.

Радуйся, яко чудеса в Церкви совершающаяся духом веры благоразумно уразумевый.

Радуйся, преподобне царевиче Петре, Ростовский чудотворче.

Кондак 10

Спасти хотя душу свою, блаженне царевиче Петре, всякими добрыми нравы себе украшал еси, по словеси апостола Павла: "Елика истинна, елика честна, елика прелюбезна, елика доброхвальна"; сия помышляя, научился в умилении духовнем воспевати Богу: Аллилуия.

Икос 10

Стена был еси ограждения, блаженне царевиче Петре, всем к тебе усердно притекающим. Темже и мы, аще и недостойнии, прибегающе и с любовью тя хваляще, вопием:

Радуйся, благословение архипастыря на устроение храма и обители приявый.

Радуйся, у князя Ростовскаго землю на созидание обители испросивый.

Радуйся, князя искушающа тя, да сребром и златом апостолы в данным, место искупиши, незлобиво послушавый.

Радуйся, назначение цены за уреченное место по девяти сребренник и единой златице послушливо исполнивый.

Радуйся, пророчество святителя Игнатия о неоскудении сребра и злата из мешцев разумевый.

Радуйся, в видении верховных апостол назначенное для обители место, узревый.

Радуйся, сребро и злато, яко дарование от апостол, с верою приемый.

Радуйся, дарованным от них серебром и златом на обитель землю приобретающий.

Радуйся, на тоежде серебро и злато монастырь честен устроивый.

Радуйся, яко останки того серебра и злата на удивление и благоговение до позднейших времен оставивый.

Радуйся, яко духовная ограда, мощи твоя святые во обители обретошася.

Радуйся, преподобне царевиче Петре, Ростовский чудотворче.

Кондак 11

Пение церковное во святых новосозданней тобою обители, во имя святых верховных Апостол совершаешься, ты же, блаженне царевиче Петре, яко строитель храма и обители святые, радовашеся душою и веселяся сердцем вопиял еси Богу: Аллилуия.

Икос 11

Яко светозарную звезду во обители, и светоносную свещу на свещнице Церкви Христовой, зрим тя, преподобне царевиче

Петре, и во умилении душ и сердец наших поюще, взываем ти сице:

Радуйся, и в супружестве быв, обители тобою созданней помогавый.

Радуйся, по скончании супружницы твоея отвергийся мира.

Радуйся, в созданную тобою обитель преселивыйся.

Радуйся, монашеское в ней житие восприявый.

Радуйся, в ангельский образ облеченный.

Радуйся, паки и во иноцех Петром нареченный.

Радуйся, образ добродетельнаго жития всей братии бывый.

Радуйся, смирение глубочайшее стяжавый.

Радуйся, пощению внимаый.

Радуйся, молитвы твоя к Богу яко благовонный фимиам, возносивый.

Радуйся, по трудах многих во обители твоей ко Господу в невечерний свет отшедый.

Радуйся, яко Преблагий Господь, за премногия твоя добродетели, святыя твоя мощи нетлением прослави.

Радуйся, преподобне царевиче Петре, Ростовский чудотворче.

Кондак 12

Велия благодати сподобился еси от Бога, преподобне царевиче Петре, яко из языческия прелести в веру христианскую тя Бог обрати, и из тьмы поклонения твари в познание Евангельския благодати призва: последи же из мирскаго мятежа исхитив, ангелоподобному житию в тишине святыя обители сподоби, по кончине же мощи твоя святыя нетлением прослави. Темже толико тя прославившему Богу со страхом и радостию вопием: Аллилуия.

Икос 12

Поюще память верховных апостол Петра и Павла и совершающе празднество дванадесяти апостолов, воспоминаем твоя подвиги с любовию, угодниче Божий преподобне царевиче Петре, и всечестную память, и взываем сицевая:

Радуйся, по пути Господню ходивый.

Радуйся, веру Христову до конца соблюдый.

Радуйся, Петру, каменю веры, последовавый.

Радуйся, Павлу, сосуду избранному, елико
мощно уподобивыйся.

Радуйся, всем святым апостолом во
благочестии ревновавый.

Радуйся, древних преподобных отцев
подражателю.

Радуйся, ангельских чинов сопричастниче.

Радуйся, царей православных поможение.

Радуйся, святителей веселие.

Радуйся, лика преподобных красото.

Радуйся, немощных целителю и злобных
бесов прогонителю.

Радуйся, телес и болезней наших врачу.

Радуйся, о душах наших теплый к Богу
молитвенниче.

Радуйся, преподобне царевиче Петре,
Ростовский чудотворче.

Кондак 13

О препетый и прехвальный чудотворче отче
наш преподобне царевиче Петре, видимо в
созданней тобою святей обители мощами

твоими пребываяй, невидимо же от небесных чертог нас грешных чад своих, назираяй! Приими сие малое приношение, от любви душевныя тебе возсылаемое, и от всякия избави напасти всех: дерзновенным же твоим ко Христу Богу ходатайством будущия нас изми муки, да с тобою в безконечныя веки воспеваем Богу: Аллилуия.

Этот кондак читается трижды, затем икос 1-й и кондак 1-й

Молитва

О преблаженне и преподобне Петре царевиче, Ростовский чудотворче! Якоже из мрака языческаго во свет Евангельскаго учения Господь тя призва: тако умоли Его, да и нас по неизреченней Своей благодати и человеколюбию измет всеильною Своею Десницею из тмы греховныя, и осияет сердца наша к деланию Его божественных заповедей. Якоже ты избег мятежа мирских волнений, во ангелоподобное безпечальное житие сподобился еси достигнути, тако сподоби и нам грешным моря сего, влаемаго страстьми, пучину безмятежно преплыти, имея тя, отче, кормчаго о Господе нашем, и достигнути чистым покаянием ко

пристанищу спасения вечнаго. И якоже имел еси споспешников тебе верховных апостолов Петра и Павла в созидании обители, тако подвигни их умилосердиться и о нас недостойных, и даровати нам от сугубыя апостольския благодати дерзновение ко Христу Богу. Веруем бо, яко аще мощи твоя святыя и сокровенны в земли, но ты царствуеши со избранными Божиими на небеси: исходатайствуй убо, да и нам грешным молитвами твоими, да отверзется дверь Царствия Небеснаго в безконечныя веки. Аминь.

